

REGLEMENT FOR KONTROLLUTVALET I VAKSDAL KOMMUNE

1. Kontrollutvalet sitt føremål

Kontrollutvalet er eit lovpålagt kommunalt organ oppretta med heimel i kommunelova § 23-1. Utvalet skal føra regelmessig kontroll på kommunestyret sine vegne.

Utvalet skal gjennom sitt arbeid bidra til at innbyggjarane og andre interessentar har tillit til Vaksdal kommune, og at kommunen leverer sine tenester og utfører sitt mynde effektivt og målretta i samsvar med lov, forskrift og andre reglar samt kommunestyret sine føresetnader og vedtak. Kontrollutvalet skal framstå som eit kompetent, uavhengig, objektivt og synleg organ med høg integritet.

Folkevalde organ skal, etter kommunelova § 5-13, ha eit reglement som fastset

- a) Organet sitt verkeområde og eventuelle vedtaksmynde
- b) tidsperioden som organet er oppretta for
- c) eventuelle andre sentrale føresegner om organet si verksemd

2. Val og samansetjing

Kontrollutvalet skal ha minimum 5 medlemmar.

Kommunestyret vel medlemmane og varamedlemmane til utvalet, og blant medlemmane leiar og nestleiar.

Minst eit av medlemmane skal veljast mellom kommunestyret sine medlemmar.

Leiar og fleirtalet i kontrollutvalet skal ikkje vera medlem av same parti eller tilhøyra same gruppe som ordføraren.

Det er særskilde reglar om val til kontrollutvalet, jmf. kommunelova § 23-1.

3. Ansvar, mynde og oppgåver

Kontrollutvalet sitt ansvar og mynde føl av kommunelova § 23-2 og forskrift om kontrollutval og revisjon kapittel 1.

Kontrollutvalet sine oppgåver er gitt i kommunelova kapittel 23 og i forskrift om kontrollutval og revisjon. Det er berre kommunestyret som kan pålegge kontrollutvalet oppgåver utanom dei oppgåvene som er lovfesta.

Kontrollutvalet skal innan sitt saksområde arbeida med:

- utarbeida forslag til budsjett for kontrollarbeidet i kommunen.
- halde seg løpande orientert om revisjonsarbeidet
- påsjå at kommunen sine rekneskap blir revidert på ein trygg måte.
- påsjå at rekneskapsrevisjonen vert utført i samsvar med lov, forskrift og kontrollutvalet sine instruksar og avtalar med revisor

- påsjå at rekneskapsrevisjonen vert utført av revisorar som oppfyller krava i forskrift om kontrollutval og revisjon
- påsjå at det vert ført kontroll med at den økonomiske forvaltninga vert gjennomført i samsvar med gjeldande avgjerder og vedtak.
- påsjå at det vert gjennomført forvaltningsrevisjon av kommunen si verksemd, og av selskap kommunen har eigarinteresser i, medrekna utarbeiding av plan for forvaltningsrevisjon innan utgangen av året etter kommuneval.
- påsjå at det vert ført kontroll med forvaltninga av kommunen sine eigarinteresser i selskap mv. (eigarskapskontroll), medrekna utarbeiding av plan for eigarskapskontroll innan utgangen av året etter kommuneval.
- påsjå at kommunestyret sine vedtak ved behandling av revisjonsrapportar blir følgt opp.
- gjennomføre undersøkingar som utvalet meiner er naudsynt.
- vurderer å stille i generalforsamling, representantskap og tilsvarende organ der ein har rett til å vera til stades.
- rapportera resultatane av sitt arbeid til kommunestyret undervegs og/eller i utvalet si årsmelding.

Utvalet kan, utan hinder av teieplikta, krevje at kommunen legg fram alle opplysningar, utgreiingar eller dokument som utvalet vurderer som føremålstenlege for å få utført sine oppgåver, og for å få gjennomført utvalet sine vedtekte undersøkingar.

4. Saksbehandling

Kommunelova kapittel 11, og reglement for saksbehandling i folkevalde organ, vedtatt av kommunestyret, gjeld for kontrollutvalet si verksemd, så langt ikkje anna er bestemt i lov eller forskrift.

Leiar i kontrollutvalet set opp sakliste for kvart enkelt møte, og sørgjer for innkalling til utvalet sine møte. Innkallingar skal sendes til medlemmane i utvalet, ordførar, kommunen sin oppdragsansvarlege revisor og til postmottak i kommunen. Utvalet praktiserer i hovudsak fysiske møte. Det vert elles vist til kommunelova § 11-7 om fjernmøte

Rådmannen eller tilsett i kommunen kan kallast inn til møte i kontrollutvalet for å svare på spørsmål om faktiske forhold eller klargjere eit saksforhold. Rådmannen skal alltid orienterast dersom tilsette vert kalla inn til utvalet. Kontrollutvalet har høve til å gjennomføre høyring, der det vert funne føremålstenleg.

Kommunestyret skal sørge for sekretariatsbistand som tilfredsstillar utvalet sitt behov, jf. kommunelova § 23-7. Sekretariatet skal vere uavhengig av kommunen sin administrasjon og av den som utfører revisjon for kommunen. Sekretariatet er direkte underlagt kontrollutvalet. Dermed kan heller ikkje medlemmar av kontrollutvalet vere sekretær for utvalet. Sekretariatet skal førebu sakene for utvalet og skal påsjå at sakene som utvalet får til behandling er forsvarleg utgreidd. Sekretariatet skal også påsjå at kontrollutvalet sine vedtak blir iverksett.

Kontrollutvalet skal rapportere resultatane av sitt arbeid til kommunestyret.

Kontrollutvalet innstiller til kommunestyret i alle saker som gjeld kontrollutvalet sitt ansvarsområde, så sant ikkje anna følgjer av lov eller forskrift.

Leiar i kontrollutvalet, eller den av dei andre i utvalet leiar utpeikar til å utøve denne retten på sine vegne, har møte- og talerett i kommunestyret når utvalet sine saker vert behandla.

Kontrollutvalet skal rapportere resultatane av sitt arbeid til kommunestyret. I saker som skal oversendast til kommunestyret, skal rådmannen vanlegvis få høve til å uttale seg før kontrollutvalet behandlar saka. Døme: forvaltningsrevisjonsrapportar. KMD har uttrykt at uttale frå rådmannen ikkje er aktuelt i nokre tilfelle. Døme: Val av revisjonsordning, val av revisor, val av sekretariatsordning og val av sekretariat for kontrollutvalet.

Utvalet skal kvart år utarbeide årsmelding om kommunen si verksemd. Denne vert å rekna som ein del av den pålagde rapporteringa frå utvalet. Såleis er det kommunestyret som godkjenner årsmeldinga i eiga sak.

Kontrollutvalet kan ikkje overprøve politiske prioriteringar som er føretekte av kommunen sine folkevalde organ.

5. Fråsegner

Fråsegner på vegner av kommunen vert å leggja fram for kommunestyret/formannskapet.

Utvalet kan gje sjølvstendige fråsegner innan sitt saksfelt.